

皇朝藩部要略

皇朝藩部要略卷之十一

前史官壽陽

祁韻士

纂

寶山

毛嶽生

編次

江陰

宋景昌

校寫

平定

張 穆

覆審

厄魯特要略三

六十一年

詔以書諭策妄阿喇布坦。

命哲卜尊丹巴呼圖克圖簡喇嘛齋往其向伊犁進兵之事暫停四月。

命撫遠大將軍允禩復往軍前。

詔青海撤噶斯駐防軍。仍備兵游牧。從阿喇納言。

命富甯安統大兵移駐烏魯木齊。十一月。

世宗憲皇帝命大將軍允禩馳驛來京輔國公延信馳赴甘州管理大將軍印務。貝勒旺舒克喇布坦卒無嗣。朋素克旺札勒子達顏爲從子謀奪其屬。

遣侍郎常壽勘狀。達顏弟噶爾丹岱青諾爾布口吃。達什車凌其子也。年十有四。達顏妻玉木楚木察罕達喇請以達什車凌襲旺舒克喇布坦爵。

允之。降襲固山貝子。

詔善視達顏妻復

諭朋素克旺札勒勿得私攘其屬是年貝子羅卜藏達爾札卒子濟克濟札布降襲輔國公

雍正元年

諭曰自西陲用兵青海王以下台吉以上各著勞績皇考曾降旨俟凱旋日計功今青海王台吉等歷年效績應各酌加封賞其率兵進藏及駐防噶斯柴達木等眾應令各處將軍分別加賞敘功郡王察罕丹津晉封和碩親王貝勒額爾德尼額爾克托克托鼐晉封多羅郡王貝子額璘沁達什拉察布晉多羅貝勒輔國公敦

多布達什噶爾丹達什皆晉鎮國公。諸台吉進爵有差。獨台吉車凌敦多布因母楚克納賚納木札勒以所屬唐古特兵萬請從大軍入藏且助獻糧餉。

封多羅貝勒蓋異數也。

命察罕丹津轄其從子丹衷屬眾。丹衷者根特爾子也。初授輔國公。以大軍自青海討準噶爾遣所部助獻糧餉復以兵從至藏晉封固山貝子尋卒無嗣。

詔追封郡王遺奏獻部眾及牧地。

上不忍納。

諭曰。丹衷實心效力身故絕嗣朕富有天下四海爲家。

豈有利其所屬之理。著四川提督岳鍾琪遣員會同札薩克等察明戶口數目歸察罕丹津轄務使各得其所勿稍擾累至丹衷屬宰桑等素著勤勞亦著分別加賞詔封厄魯特色布騰旺布多羅貝勒晉封輔國公茂海固山貝子先是議由裏塘遷達賴喇嘛赴藏羅卜藏丹津違

命且扇察罕丹津謀興兵襲諸台吉察罕丹津有惑志尋悔罪

詔察罕丹津及羅卜藏丹津領青海右翼察罕丹津收河東近松潘羅卜藏丹津牧河西近布隆吉爾地以河

爲界七月年羹堯請于布隆吉爾建城駐兵

從之八月總理王大臣等遵

旨議討羅卜藏丹津初羅卜藏丹津襲其父達什巴圖爾親王爵從大軍入藏歸覬爲唐古特長陰約策妄阿喇布坦授已復誘青海台吉等盟察罕托羅海令如所部故號不得復稱王貝勒貝子公等爵而自號達賴琿台吉以統之貝勒朋素克旺札勒輔國公濟克濟札布懼不敵爲所脅令掠鄰牧及內地邊貝勒羅卜藏察罕車凌敦多布拉察布土爾扈特台吉諾顏格隆諾爾布等並附逆察罕丹津不之附將構難會羅卜藏丹津強

授準噶爾部貝勒色布騰札勒兵令掠西甯色布騰札勒不從亦遣使告

詔西甯松潘兵馳往援有拉察布者察罕丹津兄墨爾根諾顏子也附羅卜藏丹津以兵掠察罕丹津牧察罕丹津攜孥及屬百餘奔至河州老鴉關外總理青海事務侍郎常壽置之河州邊內羅卜藏丹津復以兵掠河州界因徙孥蘭州察罕丹津屬額爾克札爾瑚齊阿勒達爾和碩齊拉木布等以戶千餘丹衷宰桑噶隆色布騰達什等以戶七百餘相繼來歸羅卜藏丹津又以兵四千掠郡王額爾德尼額爾克托克托鼐牧額爾德尼

額爾克托克托鼐拒之不敵攜妻問道至甘州乞援子
阿喇布濟索諾木達什等集眾拒賊鏖戰七日賊始退
率兵五百及戚屬千餘來歸署撫遠大將軍貝子延信
置之蘇油口內鎮國公噶爾丹達什攜屬台吉阿旺達
什巴等避至甘州境並於蘇油口內安插準噶爾族貝
勒色布騰札勒避亂內徙輔國公車稜弟班珠爾從至
延信並置之西川口外準噶爾札薩克公品級台吉阿
喇布坦者察罕丹津女夫也與察罕丹津相失尋偕察
罕丹津宰桑巴圖等攜戶千四百餘來歸延信以額爾
尼額爾克托克托鼐等不附逆狀馳疏聞

諭曰青海台吉皆顧實汗嫡孫自我朝

太宗文皇帝時顧實汗與達賴喇嘛恭順效力迄今百年蒙

皇考施以恩寵加封名號普加庇護後經策妄阿喇布坦敗壞黃教圍困西藏殺害拉藏且復謀侵爾等於是
我

皇考眷念顧實汗子孫之意其罪未明尙不忍卽加征
仰體

皇考眷念顧實汗子孫之意其罪未明尙不忍卽加征

討已遣侍郎常壽往問羅卜藏丹津所行情事若能知罪悔過朕定其是否和解爾眾仍令爾兄弟照舊安居如果羅卜藏丹津不遵朕旨侵犯邊塞豈可不遣兵征剿今王屬眾人等盡被劫掠窮困來至甘州朕聞之不勝惻然特遣郎中通智分給廩餼牲畜令從豐厚王等在彼安居不須憂慮朕斷不使爾等有拮据也時上以和碩特族自相殘不忍遽加兵

詔常壽傳諭羅卜藏丹津罷兵不從則懲治之羅卜藏丹津詭言親王察罕丹津郡王額爾德尼額爾克托克托鼐謀據唐古特諸台吉不服將興兵與決勝負蓋以

察罕丹津額爾德尼額爾克托克托鼐首不附已欲誣以罪因脅諸台吉奉已如鄂齊爾汗駐唐古特以遙制青海也。

上惡其狡不可諭決計討之。

敕川陝總督年羹堯曰羅卜藏丹津自其祖顧實汗敬謹恭順達什巴圖爾慕化來歸晉封親王復令其子羅卜藏丹津襲封自宜仰體寵眷敬奉法紀乃妄逞強梁骨肉相仇欺凌親王察罕丹津郡王額爾德尼額爾克托克托鼐等恣行倡亂朕甫聞其事遣使往諭令伊講和修睦式好無尤乃肆意稱兵侵襲察罕丹津額爾德

尼額爾克托克托鼐以致投入內境是其孤負朕恩悖逆天常擾害生靈誅戮不可稍緩朕欲大張天威特命爾爲撫遠大將軍統領大兵往聲羅卜藏丹津罪如抗拒卽行剿滅其黨有懼羅卜藏丹津勢暫爲脅從者果悔罪來歸卽行寬宥有能擒斬羅卜藏丹津者分別具奏有情急來歸者加意撫卹其不抗拒者毋加殺戮羅卜藏丹津詭罷兵誘常壽至察罕托羅海留之遣叛黨分掠西甯諸路扇賊番等爲應副將軍阿喇納自吐魯番馳赴噶斯斷由穆魯烏蘇往藏路副將王嵩參將孫繼宗等擊賊黨于布隆吉爾及鎮海堡申中堡北川

新城等處四川提督岳鍾琪以雜谷土司等兵剿歸德
堡上寺東策卜下寺東策卜及南川口外郭密諸番復
檄前鋒統領蘇丹等協剿所至告捷羅卜藏丹津懼送
常壽歸請罪

諭年羹堯曰伊乃深負國恩與大軍對敵之叛賊國法
斷不可宥不得因伊曾封王爵稍存疑慮其與羅卜藏
丹津同謀之王貝勒貝子公等既經背叛卽宜削爵伊
等或來歸順或被擒獲不必更論封爵但視行事輕重
可寬宥者從寬應治罪者治罪羅卜藏丹津以索諾木
達什鄰牧誘擒之尋脫歸

諭曰索諾木達什竭誠報國盡忠效力今聞脫身來歸
良慰朕懷特沛殊恩著封固山貝子給上等產業索諾
木達什鎮國公敦多卜達什弟也

二年春正月

詔土默特右翼都統根敦率滿洲兵二千赴巴里坤防
禦青海叛賊尋分兵千駐吐魯番境

詔以岳鍾琪爲奮威將軍參贊軍務大軍至貝勒色布
騰札勒首率戶口二千餘迎降署撫遠大將軍延信置
之西川口外諸附逆者並懼叛黨吹喇克諾木齊札什
敦多布等遁噶斯朋素克旺札勒偕達什車稜擒吹喇

克諾木齊之宰桑都喇勒及札什敦多布母乞降岳鍾
琪令追剿吹喇克諾木齊東擒至羅卜藏察罕率屬台
吉袞布色布騰納罕伊什等降其母復攜諸台吉妻請
內徙車凌敦多布女兒亦奔赴之

詔置西甯口外楚克賚納木札勒尋攜車凌敦多布及
屬戶千餘請降

詔置伊克烏蘭和碩並給茶麥諸物養之拉察布懼誅
奔巴爾喀木子察罕喇布坦旺舒克喇布坦迎降招其
父拉察布至獻駝馬千餘

詔削貝勒爵降鎮國公諾顏格隆諾爾布并台吉根敦

等皆乞降且請從剿賊自贖岳鍾琪奉

命進剿。偵從賊之巴爾珠爾阿喇布坦自烏蘭博爾克遁尾擊之至伊克喀爾吉擒其黨阿喇布坦鄂木布遣西甯總兵黃喜林由西爾哈羅色赴柴達木斷噶斯路。偵羅卜藏丹津走烏蘭穆和爾鍾琪復分兵馳擊擒其母阿爾泰。俘戶畜無算。羅卜藏丹津及其黨分道竄侍衛達鼐等擒丹津。璉台吉于華海子。阿布濟車臣台吉于布哈色。布蘇吹喇克諾木齊札什敦多卜等于烏蘭克羅卜藏丹津走準噶爾逆黨悉檻送京師。詔行獻俘禮尋逆黨吹喇克諾木齊阿喇布坦鄂木布

藏巴札木巴爾珠爾阿喇布坦札什敦多布格勒克阿
喇布坦巴蘇泰及察罕丹津從子塔爾寺喇嘛堪布諾
捫汗等悉伏誅。準噶爾族貝勒色布騰札勒以導從逆
之貝勒羅卜藏察罕輔國公車稜台吉諾爾布等悔罪
內附功晉封多羅郡王。貝子達什車稜之父台吉噶爾
丹岱青諾爾布以不從逆且以兵擊賊黨功封固山貝
子世襲罔替。青海世爵自此始。其從逆之貝勒羅卜藏
察罕額璘沁達什輔國公濟克濟札布皆削爵。貝勒車
稜敦多布降爲貝子。貝勒拉察布降爲鎮國公。噶爾丹
岱青諾爾布尋卒。其妻請以達什車稜兼襲之。理藩院

三
議蒙古無襲兩世爵例

諭曰噶爾丹代青諾爾布於青海羅卜藏丹津事著有勞績因議功封爲貝子今既病歿伊兄弟兩家止有貝子達什車凌一人著從優加恩并兩貝子爵爲貝勒仍世襲罔替旋授札薩克有中甸者隸雲南麗江府羅卜藏丹津給僞劄令附己大軍至率戶三千餘請降洮岷界外諸番舊爲青海屬悉就撫其不順者剿誅之阿岡多卜藏瑪嘉鐵布納珠公寺朝天堂桌子山碁子山先密寺興馬寺阿落西脫巴上篤爾素華藏上札爾的諸番眾以次底定青海患始靖

御製平定青海文立石太學文曰我國家受

天眷命撫臨八極日月所照罔不臣順遐邇乂安兆人
蒙福乃有羅卜藏丹津者其先世顧實汗自國初稽首
歸命當時使臣建議畀以駐牧之地其居雜番羌密邇
甘涼我

皇考聖祖仁皇帝睿德深遠每塵于懷旣

親御六師平定朔漠威靈所加青海部落達什巴圖爾
等震讐承命

聖祖仁皇帝因沛殊恩封爲親王兄弟八人咸錫爵祿
羈縻包容示以寬大而狼心梟性不可以德義化三十

年來包藏異志朕紹登寶位優之錫賚榮其封號尙冀革心輯甯部眾而羅卜藏丹津昏謬狂悖同黨吹喇克諾木齊阿喇布坦鄂木布藏巴札木等實爲元惡謂國家方宏浩蕩之恩不設嚴密之備誕敢首造逆謀迫脅番羌侵犯邊城反狀彰露用不可釋于天誅遂命川陝總督太保公年羹堯爲撫遠大將軍聲罪致討以雍正元年十月師始出塞自冬涉春屢破其眾凡同叛之部落戈鋌所指應時摧敗招降數十萬眾又降其貝勒貝子公台吉等二十餘人朕猶憫其愚蠢若悔禍思愆束手來歸尙可全宥而怙惡不悛負險抗違乃決翦滅之

計以方略密付大將軍年羹堯調度軍謀簡稽將士用
四川提督岳鍾琪爲奮威將軍於仲春初旬禡牙徂征
分途深入擣其窟穴電掃風馳搜剔巖阻賊徒蒼皇糜
潰窮蹙失據羅卜藏丹津之母及謀逆渠魁悉就俘執
擒獲賊眾累萬牲畜軍械不可勝計賊首逃遁我師逾
險窮追獲其輜重人口殆盡羅卜藏丹津子身易服竄
匿荒山殘喘待斃自二月八日至二十有二日僅旬有
五日軍士無久役之勞內地無轉輸之費克奏膚功永
清西徼三月之朔奏凱旋旅饒歌喧轟士眾欣喜四月
十有二日以倡逆之吹喇克諾木齊等三人獻俘

廟社受俘之日臣民稱慶伏念

聖祖仁皇帝威靈震于遐方福慶流于奕葉用克張皇六師殄滅狂賊行間將士亦由感激湛恩厚澤爲朕踴躍用命斯役也芟夷凶悖綏靖番羌俾烽燧永息中外人民胥享安阜實成

先志以懋有丕績廷臣上言稽古典禮出征而受成于學所以定兵謀也獻馘而釋奠於學所以告凱捷也宜刊諸珉石揭于太學用昭示于無極遂爲之銘曰天有雷霆聖作弧矢輔仁而行威遠甯邇維此青海眾類實繁錫之茅土列在藩垣被我寵光位崇祿富負其阻遐

禍心潛構恭惟

聖祖慮遠智周瞻念荒服撫綏懷柔朔野旣清四陲攸震備號淳加示之恩信如此兇狡造謀逆天鼓動昏憝寇侵于邊惟彼有罪自干天罰桓桓虎貔用張九伐王師卽路冬雪初零日耀組練雷響鼙鉦蠢茲不順敢逆戎旅奮張螳臂以當齊斧止如山岳疾如雨風我戰則克賊壘其空彼昏終迷曾不悔戾當翦而滅斯焉決計厲兵簡將往擣其巢踰歷嶽巒坦若通郊賊棄其家我繫而獲牛馬谷量器仗山積蹇免失窟何所逋逃枯魚游金假息煎熬師以順勤神明所福旬日凱歸不疾而

速殞彼逆謀懸首藁街獻俘成禮金鼓調諧西域所瞻此惟雄特天討旣申羣酋惕息橐戈偃革告成辟雍聲教遐暨萬國來同惟我

聖祖親平大漠巍功煥文邁桓軼酌流光悠久視此銘辭繼志述事念茲在茲王大臣等遵

旨議善後事宜奏青海王台吉等應論功罪定賞罰游牧地令各分界如內札薩克例百戶置佐領一不及百戶者爲半佐領以札薩克領之設協理台吉及協領副協領參領各一每參領設佐領驍騎校各一歲會盟令奏選盟長勿私推貢期自明年始分三班九年一周自

備駝馬由邊入京市易以四仲月集西甯四川邊外納
喇薩喇地官兵督視有擅入邊牆者治罪又羅卜藏丹
津之吹宰桑及察罕丹津從子丹衷之宰桑色布騰達
什等率眾降請各授千百戶等官又喀爾喀居青海者
勿復隸和碩特旗令別設札薩克土爾扈特及準噶爾
輝特如之至西番部眾凡陝西所屬甘州涼州莊浪西
甯河州四川所屬松潘打箭鑪裏塘巴塘雲南所屬中
甸等處或爲喇嘛耕地或納租青海但知有蒙古不知
有廳衛營伍諸官今番眾悉歸化應擇給土司千百戶
巡檢等職令附近道廳及衛所轄又青海及巴爾喀木

藏衛舊稱唐古特四大部顧實汗侵據之以青海地廣可牧畜巴爾喀木糧富令子孫游牧青海而巴爾喀木納其賦藏衛二地舊給達賴喇嘛班禪喇嘛今以青海叛取其地應令四川雲南諸官管理又達賴喇嘛遣人赴打箭鑪駝裝經察木多乍雅裏塘巴塘向喇嘛等索銀有差名曰鞍租至打箭鑪納稅請飭達賴喇嘛勿收鞍租打箭鑪免取稅歲給達賴喇嘛茶五千觔班禪喇嘛半之又西甯各寺喇嘛多者數千少者五六百易藏奸前羅卜藏丹津叛喇嘛率番眾抗大兵請于塔爾寺喇嘛選老成者三百給印照嗣後歲察二次廟舍不得

過二百喇嘛多者三百少者十餘番民糧賦令地方官
管理度各寺歲用給之又陝西邊外河州西甯蘭州中
衛甯夏榆林莊浪甘州等處水草豐美林麓茂密蒙古
諸部戀牧大草灘及昌寧湖請于西寧北川邊外上下
白塔等處自巴爾托海至扁都口築城堡令蒙古等勿
妄據又肅州西洮賚河常瑪爾鄂敦塔拉等處應募民
墾膏腴地庶漸致富饒至甯夏險要無過阿拉善顧實
汗裔舊游牧山後今或徙至山前請令阿拉善札薩克
郡王額駙阿寶飭所屬歸阿拉善後其山前營盤水長
流水等處悉爲內地又甘州西甯界各設營汛令蒙古

等不敢覬覦。又巴爾喀木等部眾自羅隆崇東察木多乍雅外諸番目悉給印照視內地土司例。又青海屬左格諸番請徙內地阿巴土司頭目墨丹住等從剿有功請給安撫司銜不隸青海轄。又西甯邊內可耕地請發直隸山西山東河南陝西五省遣犯能種地者官給牛具籽種三年後起科如例。又甘州諸黃番應招撫爲青海藩籬。青海諸部令各守牧地不得強據妄掠商賈察罕諾捫汗喇嘛廟毋得私聚議事遣官齎。

敕往不論秩崇卑王公以下跪迎有背貳者必懲。上從之先是議撤駐藏兵阿拉善札薩克阿寶自藏歸。

會羅卜藏丹津叛。

詔諸路蒙古兵聽年羹堯檄調羹堯忌阿寶功復以身爲大將軍蔑視之奏阿寶所率兵不堪用且身有疾應遣歸游牧未幾阿寶來朝

上憫其勞慰諭之

詔封多羅郡王

賜銀萬兩至是以青海旣定

詔飭青海衆歸牧山後阿寶奏臣祖顧實汗歸誠內附百年於茲受

天朝恩甚厚前青海昆弟阻兵構亂上干

天討臣當束身受誅重荷

恩宥令安游牧感激莫報乞

賜青海曠地令臣鈐轄諸部不復萌異志

三年

詔以青海貝子丹忠所遺博羅充克克牧地給阿拉善
郡王阿寶居之并鈐青海族屬

諭撫遠大將軍年羹堯遣員齎餉助徙牧博羅充克克
者卽漢書地理志所稱潢水也青海和碩特鄂齊爾汗
裔鎮國公噶爾丹達什輔國公諾爾布明素克車稜車
臣岱青裔貝勒降台吉羅卜藏察罕輔國公降台吉濟

克濟札布台吉達瑪璘色布騰額璘沁達什子阿喇布坦達蘭

額璘沁達什子

泰裔郡王額爾德尼額爾克托克托鼐達賴烏巴什裔

台吉札布伊勒都齊裔親王察罕丹津鎮國公拉察布

輔國公阿喇布坦札木素達賴巴圖爾裔貝勒達什車

稜朋素克旺札勒台吉伊什多勒札布瑚嚕木什裔貝

子車稜敦多布台吉色布騰博碩克圖桑噶爾札裔索

諾木達什色稜哈坦巴圖爾裔台吉哈爾噶斯準噶爾

族郡王色布騰札勒土爾扈特族保蘭阿噶勒琥裔台

吉索諾木喇布坦多爾濟莽海裔台吉諾爾布額濟內

裔台吉丹衷察罕喇布坦輝特族台吉貢格及察罕諾

門汗並授札薩克。其和碩特族哈納克土謝圖裔台吉
車稜納木札勒授公中札薩克。準噶爾族原授札薩克
公品級一等台吉阿拉布坦晉封輔國公各歸舊牧鑄
總理青海蒙古番子事務關防。

遣大臣齎鎮其地轄所部札薩克以年羹堯不善撫其
眾

飭責之曰朕聞郡王額爾德尼額爾克托克托鼐部眾
窮困流離資生窘乏親王察罕丹津所屬雖稍能存活
亦屬貧窮爾身爲撫遠大將軍理應酌量事勢緩急人
口多寡盡心籌畫辦理乃僅發銀萬兩爲賑濟用眾札

薩克遭叛賊掠奪部眾窮窘流離投命來歸全賴安置
得所俾其衣食有資咸登樂利此諸部落人眾流離失
所豈萬金所能給耶岳鍾琪復奏青海親王察罕丹津
鎮國公拉察布等游牧河東地近河州松潘各路前議
市納喇薩喇地狹恐不給蒙古需請改市河州及松潘
河州定于土門關附近雙城堡松潘定于黃勝關之西
河口二地並有城屋水草美互市可久又郡王額爾德
尼額爾克托克托鼐色布騰札勒等游牧河西地近西
甯請改市西甯口外丹噶爾寺至蒙古歲資牲畜請每
年六月後聽不時貿易庶蒙古商眾咸獲利益

允之察罕丹津等徙牧定遂請入覲

詔各給整裝銀千兩八百兩六百兩有差
宥拉察布罪授札薩克仍領游牧眾九月靖邊將軍富
甯安奏策妄阿喇布坦遣使入

朝甚屬恭順巴爾庫爾等處兵丁應行撤回

從之王大臣議青海之準噶爾輝特土爾扈特請勿令
隸和碩特旗

諭允又

詔以青海和碩特哈爾噶斯爲札薩克一等台吉蓋和
碩特族之游牧青海者自額實汗裔十九札薩克外別

設札薩克二。一爲顧寶汗兄哈納克土謝圖裔。以車凌納木札爾領之一。爲顧寶汗弟色稜哈坦巴圖爾裔。以哈爾噶斯領之。

四年春察罕丹津等將歸以行期聞。

召見圓明園溫諭之復。

賜銀千兩。賚諸札薩克有差。理藩院奏游牧推河諸厄魯特請各設旗分佐領會準噶爾台吉噶爾丹策凌乞和。

詔遣散秩大臣伯四格等往勘阿爾台界。卽赴推河議編厄魯特旗隊尋奏以車稜旺布及色布騰旺布茂海

轄所屬定四佐領。

詔各給札薩克印厄魯特凡六旗曰札薩克多羅郡王車稜旺布曰札薩克多羅貝勒色布騰旺布

並阿喇
布坦子

札薩克固山貝子茂海

阿喇布坦弟達瑪璘子

別有準噶爾札薩

克一曰固山貝子多爾濟色布騰

丹濟拉子

阿拉善札薩克

卽郡王阿寶

輝特札薩克一曰輔國公巴濟

羅卜藏予以車稜旺布領之授盟長復

諭理藩院曰厄魯特諸台吉歸順

聖祖仁皇帝特恩加授官職雖無世襲之旨但伊等各有效力之處悉著降一等承襲如承襲之人或能守分

盡職仍將品級賞給其以此諭厄魯特知之有烏梁海者錯處唐努山及克木克木齊克近阿爾台汎

上以舊爲喀爾喀及準噶爾屬

詔車稜旺布及喀爾喀貝勒博貝分轄之徵其賦策妄

阿喇布坦詩賜歸三喀爾

上不允

詔前鋒統領定壽等屯特斯防護烏梁海復

諭車稜旺布等往諭德意頒賚茶布冬準噶爾台吉策妄阿喇布坦死子噶爾丹策凌立是年青海和碩特貝勒朋素克旺札勒晉封郡王

六年

敕準噶爾台吉噶爾丹策凌曰羅卜藏丹津無故弄兵殘虐骨肉朕遣大臣諭令息兵乃敢悖恩負德侵犯內境被我守邊輕兵擊敗遠竄爾父策妄阿喇布坦應卽擒獲力反隱爲匿留是何意耶羅卜藏丹津乃不忠不孝之人爾父年高歷練尙能將伊酌處可以生之亦可以制之必不爲所愚弄是以不曾勒令擒獻今爾年與彼相等羅卜藏丹津志氣乖戾不顧恩義斷不守分安居甘處爾下爾務將羅卜藏丹津送至朕念達什巴圖爾前績仍施恩豢養斷不將伊誅戮爾其祇將朕命青

海台吉羅卜藏察罕來朝

上以其悔罪且奮勉稱職

詔晉封輔國公是年厄魯特札薩克多羅郡王車稜旺布卒弟貝勒色布騰旺布襲以貝勒爵乏嗣者

詔并兩札薩克爲一復授厄魯特盟長

七年

上以準噶爾匿青海叛賊羅卜藏丹津將不靖必擾青海及唐古特因決策遣討三月命領侍衛內大臣三等公傅爾丹爲靖邊大將軍北路出師三等公岳鍾琪爲甯遠大將軍西路出師六月

上御太和殿

命大學士捧敕印授大將軍傅爾丹出征官吏行禮畢上率大將軍等詣堂子行禮吹鳴螺于兵部大纛前行禮畢遂

御長安門外黃幄大將軍等佩弓矢跪辭以次行跪抱禮

上親視大將軍等上馬啟行王大臣等議噶斯爲準噶爾通青海及唐古特要隘請選青海札薩克兵千五百分屯噶斯及柴達木得卜特爾察罕烏蘇諸路允之會噶爾丹策凌遣使告將獻羅卜藏丹津聞大軍

就道懼仍攜歸時

遣諭土爾扈特將討準噶爾使甫就道噶爾丹策凌使至

詔大軍暫緩進兵復

諭土爾扈特知之土爾扈特貝子阿喇布珠爾子丹忠初襲歸來朝

詔晉封多羅貝勒阿拉善郡王阿寶以博羅充克克牧地隘擅請徙烏蘭穆倫及額濟內河界議罪削郡王爵尋命復之仍歸阿拉善牧不復居青海

八年，靖邊大將軍傅爾丹屯科布多，將擊準噶爾。或告曰：「噶爾丹策凌以兵萬授和碩特台吉羅卜藏車凌，遣禦哈薩克設汛。」阿里瑪圖沙拉伯勒境，羅卜藏車凌棄之，率戶三千餘由噶斯走青海，將內附。噶爾丹策凌遣宰桑烏喇特巴哈曼集等追之，爲所敗。復遣喀喇沁宰桑都噶爾往襲，不之及。傅爾丹以聞。

詔副都統達鼐偵防噶斯路，俟羅卜藏車凌降，遣入覲，以兵監從眾，置內汛，勿墮詭降計。久之，羅卜藏車凌不至。羅卜藏車凌者，昆都倫烏巴什第三子，多爾濟之曾孫也。其祖曰阿海，初噶爾丹亂定，青海和碩特咸內附。

策妄阿喇布坦逼和碩特之留舊牧者與同處表請青海復舊業即噶爾丹時將陰謀爲己屬

上燭其奸

諭責之令遣和碩特歸舊牧勿私據不從尋以女妻羅卜藏車稜故昆都倫烏巴什及額雅鄂特歡裔尙爲準噶爾屬

詔阿寶率所部兵會西路大軍于巴里坤

諭噶爾丹策凌速獻羅卜藏丹津當宥罪

詔以內札薩克赴調噶斯兵干聽阿寶轄力能剿準噶爾卽率往否則入邊偕綠旗兵防內汛旣而其子二等

台吉袞布以所部兵五百赴巴里坤防準噶爾會甯遠
大將軍岳鍾琪入

觀噶爾丹策凌令其宰桑禡木特以兵二萬至科舍圖
汎偵不備謀掠駝馬總兵樊廷等以兵二千奮擊之轉
戰七晝夜阿寶子袞布偕鄂爾多斯台吉定咱喇什率
兵往援禡木特敗歸禡木特號庫克辛初爲準噶爾之
札哈沁宰桑札哈沁譯言汎卒也以宰桑領之禡木特
守阿爾台汎游牧布拉罕察罕托輝其東爲喀爾喀有
烏梁海界之烏梁海凡數種業打牲分隸喀爾喀及準噶
集賽界之烏梁海其西爲準噶爾有包沁及噶勒雜特塔木

爾包沁爲回族，準噶爾呼礮曰包，以回人司礮故名之。噶勒雜特塔本集賽皆準噶爾鄂拓克也。

命北路副將軍查納弼馳赴西軍，又調滿洲蒙古兵萬有一千赴瀚海，以衛內蒙古游牧。準噶爾賊敗遁阿寶乃自軍所歸阿拉善牧。

上以袞布能鼇勉效力。

諭獎之。

九年四月傅爾丹進城科布多。六月噶爾丹策凌遣大小策零敦多卜以兵三萬犯北路。大策零敦多卜以勇聞。小策零敦多卜善謀。先遣諜佯爲我獲。詭言厄魯特

大隊未至其前隊千餘駝馬二萬在博克托嶺距我軍三日程傅爾丹信之遣兵四千往襲賊以少兵牲畜誘我而伏兵二萬谷中乘高衝突圍我軍於和通泊傅爾丹以兵六千往援賊已潰我參贊之師直犯大營索倫蒙古兵先潰惟滿兵四千衛輜重且戰且退渡哈爾哈納河副將軍巴賽查納弼戰死七月朔得還科布多者二千人岳鍾琪聞北路被圍乃使紀成斌進攻烏魯木齊以分賊勢賊已委城先徙無所得

詔降傅爾丹爲振武將軍以順承郡王錫保代之斬先遁之參贊陳泰移科布多營於察罕瘦爾又以馬爾賽

爲撫遠大將軍屯歸化城先是遣二等侍衛札納傳
諭青海左右翼札薩克選兵萬屯青海適中地護牧官
兵皆賞裝復

命所部採買牲畜勿滋擾至是青海土爾扈特札薩克
台吉諾爾布及和碩特札薩克公拉察布以防準賊設
汎騰格里乘間叛率佐領里塔爾等盜掠汎馬奔徙袞
額爾吉庫克烏蘇貝勒達什車稜亦爲所燭將由索羅
木河竄察罕丹津聞變收拉察布牧眾遣屬台吉等捕
之額爾德尼額爾克托克托鼐遣子阿喇布濟岱輝特
台吉貢格並以兵協擊諾爾布弟色特爾布木不從其

兄徙牧且以兵剿拉察布於索羅木河。詔獎其不從逆。

賜銀八百兩授札薩克一等台吉朋素克旺札勒以兵追達什車凌歸檻獻達什車凌奏臣幼且多疾有墨爾根阿里克鄂木布者臣屬也附諾爾布叛掠臺馬臣從母徙牧圖古里克避之告臣從兄朋素克旺札勒擒墨爾根等歸乞宥臣無知罪。

諭曰達什車凌年幼以聽信讒言畏罪遷移並非有意逃遁且值朋素克旺札勒往追卽迎前陳訴又將伊屬眾私掠汎馬者擒獻贖罪著從寬免黜多羅貝勒爵或

以察罕丹津偕拉察布徙牧告。

上知其內附誠不之疑。

諭曰。拉察布雖係察罕丹津兄子。朕知其素不相睦。察罕丹津效力有年。今已老病。仍奮志報效。甚屬可嘉。著賜幣二十銀千兩。令酌給所部效力人眾。

詔青海眾札薩克曰。朕因準噶爾賊乘西路軍不備。盜駝馬。因念青海各札薩克人眾恐招逆賊侵害。諭令派兵防護。其採買馬羊者。原欲使伊等所有牧畜得變價值。可獲利益。並非需此區區助也。朕曾諭殷札納一切派兵採買。聽蒙古便。不可絲毫勉強。并慮王台吉等科

派所屬。諭嚴行禁約。豈有令遣往人逼迫蒙古從事乎。今拉察布等無故他徙。或殷札納不能宣揚朕諭。使眾心共曉。而採買馬羊。又不聽從其便。以致拉察布等心懷疑畏。暫避差徭。特頒旨諭拉察布等。令其速歸本處。準噶爾賊。或由喀喇沙爾前赴噶斯。潛行騷擾。或增人眾。窺伺青海。所部蒙古兵丁。尙未齊集。器械亦未周備。難望捍禦賊鋒。亦令官兵善爲保護。時阿喇布濟偕貢格。馳兵往擊諾爾布。里塔爾。白喀喇郭勒。追至蒙固爾托羅海。獲之。諾爾布詭稱青海諸台吉謀逆。且誣訐阿喇布濟陰約以青海軍援已。

諭曰。青海各台吉世受國恩。斷無背逆之事。親王察罕丹津聞拉察布叛。卽遣兵追捕。郡王朋素克旺札勒。聞達什車凌叛。卽率兵攜歸。額爾德尼額爾克托克托鼐父子效力行間。阿喇布濟現偕貢格追擒諾爾布。果有異志。甯有如此奮勉效力耶。尋諾爾布等械至廷臣鞠上其罪。稱諾爾布爲土爾扈特族微台吉。妄行叛逆。里塔爾身爲佐領。附逆背亂。皆應斬。諾爾布叛時。妻孥皆在游牧。請免奴給色特爾布木轄。

上從其議。復

命諸札薩克集兵七千。備準賊軍械及馬不給。

上憫之諭廷臣曰朕所以聚此兵者特爲保全伊等家口及游牧計非爲征伐調遣用也今聞其生計情形朕心深爲惻然俟從容料理必有加恩之處所聚兵七千著選派三千照前所降恩旨官員賞給本年俸銀兵丁賞銀五兩至戍卒駐防日久資斧維艱著給茶幣等項及每月所食青稞遣歸兵四千名官員等著給三月俸銀兵丁等著賞銀三兩令各回游牧準噶爾賊或潛擾青海朕意欲將伊等豫行從容遷徙令賊由遠路來一無所得不待戰而力盡我官兵與賊交戰時青海三千兵但遣襲賊後量力驅賊馬匹所得卽賞之仍計馬匹

多寡加恩議敘復

諭青海札薩克等曰爾等係顧實汗子孫自爾祖宗以來依附內地邊疆恪順供職

聖祖仁皇帝視爾等如子孫撫育六十餘年寵遇優渥且念爾等尊崇黃敎是以于達賴喇嘛班禪喇嘛等備極恩眷前羅卜藏丹津聽信流言敢行背叛我朝發兵征剿逃竄準噶爾困苦恥辱無不聞之今爾等若至彼處路途遙遠馬畜困斃彼豈能爲爾置立產業分給游牧地各令率屬保聚乎況準噶爾終歲爭戰凡用兵必置爾等于前虐使任意豈若各守祖父基業永享太平

之爲得乎。爾等若不熟計利害。聽伊誑誘之詞。依附賊人。妄思蠢動。將來興師問罪。必先及之。以擒諾爾布功封貢格爲輔國公。以阿喇布濟有擒剿功。晉授一等台吉。未幾額爾德尼額爾克托克托鼐奏年邁。乞以子代從戎。

上憫其情。

諭曰。額爾德尼額爾克托克托鼐效力有年。著將伊子內可襲王爵者。指出一人。朕加特恩。封爲長子。額爾德尼額爾克托克托鼐以索諾木丹津名奏。

詔如所請。復

諭曰朕令額爾德尼額爾克托克托鼐於諸子中選擇可襲王爵者奏請授爲長子額爾德尼額爾克托克托鼐以索諾木丹津名入奏想伊意必以阿喇布濟效力軍前將來自能受朕恩也著將阿喇布濟晉封輔國公諭內附諸番眾曰爾等沿邊番眾及青海蒙古同受國家撫綏之恩并無岐視今準噶爾賊窺伺邊境或將來侵擾青海而蒙古之游牧黃河以內者畏避賊鋒投奔近邊爾番族須留心照視勿因向有嫌怨乘其危急加以戕害或蒙古恃眾劫掠爾等用力抵禦不可退縮俟事定後朕自論其曲直分別賞罰番族蒙古皆朕赤子

果能遵朕諭旨彼此相安同受朝廷恩澤方爲無窮之福九月準噶爾大策凌敦多卜謀略喀爾喀聞順承郡王駐察罕瘦爾科布多復有振武將軍傅爾丹軍不敢進遣將取道阿爾台以東以賊眾六千分掠克嚕倫及鄂爾海喀喇烏蘇留餘眾於蘇克阿勒達呼爲之援我副將軍喀爾喀親王丹津多爾濟郡王額駙策凌等迎擊之至鄂登楚勒遣六百騎宵入賊營挑戰誘其來追而伏兵擊之大破其眾斬其驍將喀喇巴圖爾大策凌敦多卜遁走尋逾阿濟嶺至伯格爾察罕額爾克布僞書誘輝特札薩克輔國公巴濟及駐牧推河之厄魯特

輔國公茂海台吉車稜等往會達什達爾札濟克濟札布及協理台吉朋素克岱青等皆從叛復導賊掠喀爾喀牧巴濟弟噶爾丹達爾札幼巴濟攜赴準噶爾其族屬未附逆者偕喀爾喀公通謨克等徙訥穆勒圖喀喇博羅等處靖邊大將軍傅爾丹以所部徙牧告諭總督查郎阿察置之有墨爾根綽爾濟者土爾扈特貝子丹忠屬也亦叛附準噶爾丹忠懼乞內徙查郎阿令游牧阿拉克山阿勒坦特卜什等處準噶爾敗遁丹忠徙牧額濟內河初丹濟拉來歸爲大策凌敦多卜所掠攜眾至僅百餘

賜牧推河給來歸厄魯特眾至是大策凌敦多卜遣使攜書誘其子多爾濟色布騰往附謀者獲之以獻

諭廷臣曰此準噶爾反間計也多爾濟色布騰受朕恩甚深伊亦感激效力豈有墮其術中但伊游牧人等原非伊之舊屬與伊不睦若仍在喀爾喀地游牧難以居住爾等其以準噶爾書示多爾濟色布騰觀之令伊父子向內徙牧朕自加恩給與產業時多爾濟色布騰謀準噶爾兵襲推河謀內徙有台吉索諾木吹濟者誘其屬戶四十餘叛赴準噶爾多爾濟色布騰至順承王錫保軍訴稱屬眾難信請徙歸化城錫保以聞

詔游牧西喇穆稜未幾以疾請徙牧巴林及科爾沁界
諭曰爾屬眾俱係厄魯特若與內札薩克等游牧錯處
將來彼此不睦別生事端亦未可定已經定居之處不
可頻頻移徙屬眾亦甚勞苦人之壽算俱有定數豈可
因自疑故卽欲徙牧乎爾聆此諭旨省悟之後亦應自
笑其愚也拉察布之叛也攜子察罕喇布坦由索羅木
河遁察罕喇布坦諫不從副都統達鼐率兵偕青海諸
台吉追之察罕喇布坦迎降達鼐復進擊拉察布拉察
布乃悔罪自索羅木河歸青海牧

諭曰拉察布子察罕喇布坦能知其父之非不得已而

從之情甚可憫朕尙欲令察罕喇布坦襲其父拉察布公爵達鼐等遵旨議拉察布舊封貝勒以羅卜藏丹津叛不從青海衆赴西甯獨奔徙巴爾喀木降公爵今復無故遁應論罪如律但情因畏懼且追兵至輒降請令圈禁西甯以其子察罕喇布坦轄屬衆

諭曰拉察布係察罕丹津兄子著將拉察布寬免交察罕丹津嚴行管轄拉察布子察罕喇布坦著授札薩克一等台吉復

諭青海札薩克等曰青海王台吉等久荷隆恩冊封位號褒寵顯榮迄今歷有年所至于編設旗分以便稽察

賞賚惟恐札薩克等恃強凌弱互啟爭端譬厄魯特內有得秦者有鄂拓克有札薩克勒者有得木齊者皆爲易于管轄人眾而已爾有饑饉朕必加之周給隨獨行兵朕必加之賞賚從無徵輪爾蒙古者朝廷恩典至優極渥若以封號旗分爲賤亦可奏明酌改且爾阿巴賴諾顏裔現在準噶爾所果爲帥領乎抑爲屬下乎準噶爾係成吉斯汗臣僕爾等俱係成吉斯汗弟哈布圖哈薩爾子孫若以博爾濟吉特氏之先論之準噶爾乃爾屬隸柰何甘心自屈爾等當知準賊詭計勸諭屬人分別利害亦令如喀爾喀奮勇立功豈可甘自懦怯朕因

準噶爾反間諺諺降旨爾等如能遵行則可保室家游牧矣土爾扈特台吉多爾濟遣使阿爾巴圖沙喇布丹津等至奏請往謁達賴喇嘛時唐古特阿爾布巴等亂初定達賴喇嘛徙噶達歸

詔守汎者勿遣赴唐古特以其使至噶達優給糧糗比歸

頒賜茶幣等物多爾濟者納札爾瑪穆特長子也詔封阿寶子袞布輔國公撤巴里坤兵歸牧岳鍾琪奏留屯允之

諭曰衰布率所部兵效力行間勤勞懋著從前已加恩賞著仍增給銀兩并諭其父阿寶知之

十年甘肅巡撫許容疏言鎮夷口內紅布潮地巴濟屬列模居稱避準噶爾將內徙巴濟已叛歸準噶爾所部雖稱避賊豈可令居內地督臣查郎阿以巴濟屬佐領翁鄂柴等徙綽確哈魯鼐給糧茶將偕喀爾喀公通謨克等徙牧阿拉善後臣思甯夏地衍僅隔一阿拉善別無險要鎮番孤懸塞外恐厄魯特逼處人心難測請飭令密防未奉

旨內徙者毋縱入汎

詔檄查郎阿等酌徙巴濟屬未附逆者屯汎嚴轄六月
準噶爾小策凌敦多卜復糾眾三萬由奇蘭至額爾德
尼畢喇色欽我將軍塔爾岱及喀爾喀親王額駙策凌
禦之于木博圖山未至八月賊潛襲額駙策凌牧于塔
密爾河盡掠子女牲畜額駙反旆馳救并急報順承親
王請師夾攻額駙率蒙古兵二萬夜半繞間道出山背
黎明自天而下賊倉皇潰遁追擊于克爾森齊老賊大
敗而西路援師不至賊且戰且卻轉戰十餘次追至鄂
爾坤河之額爾德尼昭我兵乘暮薄險蹴之呼聲震大
漠賊三萬斬馘萬餘我兵僅傷十餘以無兵夾攻故小

策凌敦多卜乘夜遁推河盡棄輜重牲畜塞滿山谷以
阻我師時將軍馬爾賽駐拜達里克城額駢急檄馬爾
賽邀其歸路副將軍達爾濟整兵待發馬爾賽不許副
都統傅鼐跪求亦不應將士登城望見敵騎過者皆燒
荒以絕追兵無復行列翼日參贊胡琳等自開城追之
擊斬千計而賊酋已從前隊過事聞

詔斬馬爾賽及附和阻撓之都統李杕以徇初小策凌
敦多卜以兵三萬至阿爾台巴濟及達什達爾札朋素
克岱青茂海車稜等從且稱喀爾喀兵弱將導準噶爾
越察罕瘦爾掠諸札薩克游牧誘厄魯特盟長色布騰

旺布屬從叛復助掠諸部牧畜我軍偵以聞
諭曰巴濟等有負國恩罪當誅戮伊等不以降賊爲恥
反代爲賊謀喀爾喀聞之自必痛心切齒奮勇爭先矣
喀爾喀親王額駙策凌等與大敗準噶爾賊於克爾森
齊老及額爾德尼昭巴濟遁歸偕茂海車稜等各以其
族游牧特穆爾圖諾爾爲準噶爾屬尋色布騰旺布奏
稱臣父阿喇布坦歸誠後世受國恩頃準噶爾賊至方
欲偕茂海車稜議徙內地不意二人率臣屬管旗章京
班第佐領索騰等五百餘眾叛就噶爾丹策凌臣義不
肯謹率宰桑等及兵百人待命

諭曰色布騰旺布素爲朕所嘉興今感戴朕恩竭力保護所屬游牧人等不致妄動具奏請旨可嘉可憫著理藩院遣人照視酌量嚴密之處速行徙牧及是色布騰旺布又奏臣有宰桑十四屬戶四百二十以避痘不敢至內地若不徙又鄰準噶爾界乞施

恩令徙喀爾喀河附近地

允之復

諭曰宰桑等不隨逆賊誠心歸附其主甚屬可嘉色布騰旺布感念朕恩不爲準噶爾賊所誘有逃竄者復能竭力追剿著加恩賞色布騰旺布銀千兩宰桑等銀各

百兩屬戶每戶銀十兩晉封袞布固山貝子。

命御前行走。

賜三眼孔雀翎。

諭青海札薩克等曰喀爾喀奮勇剿賊爾等何獨不能各宜鼓舞振興踴躍效命賊眾侵擾青海止有噶斯一路爾等須防守隘口倘準噶爾前來務期協力追殺悉行剿除初岳鍾琪之在西路也力請城木壘屯兵二萬截賊來路與巴爾庫爾大營犄角會賊兵六千自烏魯木齊入掠哈密岳鍾琪遣總兵曹勦等距之于二堡又檄將軍石雲倬等以萬人赴烏克克嶺邀其歸路遇賊

遷延不擊縱其遠遁岳鍾琪劾奏治罪大學士鄂爾泰
并劾鍾琪坐失機會且奏報互異

詔降三等侯

召還京以查郎阿代之

命大學士鄂爾泰督巡陝甘經畧軍務以張廣泗護甯
遠大將軍廣泗奏言準夷專恃騎我兵制敵必步騎兼
用而岳鍾琪主用車非溝塹沙磧所宜且木壘界兩山
中形如金底牧廠運道所在受敵請移于西南之闊舍
圖嶺旋復奏移回巴爾庫爾于是岳鍾琪奪職拘兵部
十一年正月

命鄂爾泰經畧北路軍務七月。

命定邊大將軍平郡王福彭統大軍駐烏里雅蘇台額
駙親王策凌佩定邊左副將軍印進屯科布多

十二年二月以烏里雅蘇台距科布多遠

諭進剿機宜悉聽策凌總理五月

諭今年停止進兵遣使前往宣示利害賊眾知懼求和
卽行定議完結彼若游移推諉則整備大兵明年進剿
召北路副將軍策凌西路大將軍查郎阿來京議軍務
七月

命額駙策凌查郎阿回軍營令撤科布多軍駐察罕度

爾八月

遣侍郎傅鼐額外內閣學士阿克敦副都統羅密前往
準噶爾

諭降噶爾丹策凌九月西路副將軍張廣泗遣將敗賊
于鄂龍大阪斬四百餘級獲三十六人餘賊遠遁

十三年三月噶爾丹策凌遣使乞和表稱阿爾台舊係
厄魯特牧杭愛舊係喀爾喀牧請由哲爾格西喇呼魯
蘇至巴里坤畫界分守

詔額駙策凌議之策凌言往者喀爾喀游牧尙未至哲
爾格西喇呼魯蘇應如所請但喀爾喀汎原設阿爾台

逃東科布多額貝和碩和通額博布顏圖託爾和烏蘭等處並在哲爾格西喇呼魯蘇界外應設汎如故至準噶爾游牧應以額爾齊斯及阿爾台爲界策妄阿喇布坦存日游牧和博克薩里察罕呼濟爾以西數年來漸越額爾齊斯賊性狡請令毋越阿爾台爲永禦計

上聽其議

諭噶爾丹策凌曰夫阿爾台之屬厄魯特乃噶爾丹從前之事爾準噶爾並未越此游牧乃謂爲厄魯特牧地可乎且喀爾喀尙不令近阿爾台原欲兩界稍遠免啟爭諭而可令爾居之乎爾父在時曾請將阿爾台山梁

外哈道里哈達青吉勒布勒青吉勒三處不必置爲閒地朕未允行今特欲安逸眾生將此三處屬爾祇自克木齊克汗騰格里上阿爾台山梁由索勒畢嶺下哈布塔克拜達克之中過烏蘭烏蘇羅卜諾爾直抵噶斯口爲界并自呼遜托輝至喀喇巴爾楚克悉作閒地爾其遵諭行六月準噶爾使臣垂納木喀等齎

諭旨出西路闊舍圖卡倫而去是年

詔撤青海駐防大兵所部仍選兵二千屯阿木特爾伊克柴達木等汛以台吉達瑪璘色布騰色特爾布木領之札薩克和碩親王察罕丹津卒子敦多布旺札勒先

卒察罕丹津嗣絕。

詔以拉察布子旺舒克襲阿拉善貝子袞布始率所部
兵歸牧。